

FRANCISCO JOSÉ FRAGA CIVEIRA, Portavoz e deputado do **GRUPO SOCIALISTA** na Deputación de Ourense, en base ó previsto na Lei de Bases Reguladora do Réxime Local, ó artigo 91 e 97, entre outros, do R.O.F. e o Regulamento da Corporación presenta unha **MOCIÓN DE REXEITAMENTO Ó PECHE DAS OFICINAS BANCARIAS DA ENTIDADE “ABANCA”** que espera sexa admitida en base á seguinte:

EXPOSICIÓN DE MOTIVOS

Recentemente tivemos que asistir á tentativa de peche de varias oficinas da entidade bancaria “ABanca” na nosa provincia, que se sumaron ó acontecido noutras localidades do noso país. Concretamente, en Ourense, os directivos da entidade tiñan a intención de pechar a oficina de Villavidal (Ramirás) e a do Irixo. Isto provocou a mobilización cidadá en ámbolos dous concellos así coma o rexeitamento público por parte dos seus representantes públicos. No caso de Ramirás e tras arduas negociacións, conseguíuse chegar a un acordo momentáneo que vai ser revisado nuns meses. Detrás destas accións, lexítimas pero non éticas, hai un afán de maximización de beneficios e de redución de persoal que en nada concordan co espírito co que naceu a entidade agora convertida en banco.

Lembramos que ABanca antes de ser un banco privado tivo a súa orixe na fusión de varias caixas de aforro ligadas ás institucións públicas, dende onde se impulsou a súa creación. Unha das caixas que conformaron a antiga Caixanova foi a Caixa de Aforros Provincial de Ourense, creada por esta Deputación en 1933 e que permitiu a concesión de empréstitos a moitos e moitas ourensáns e ourensás coas remesas que chegaron dos nosos emigrantes. O desenvolvemento social e económico desta provincia, ó longo do século XX, non se comprende sen o esforzo que fixeron tantas familias que emigraron, primeiro a América e, posteriormente, a Europa e outras zonas de España. No momento do nacemento das caixas, tal como aconteceu en Vigo, quíxose aproveitar o fluxo económico existente e a necesidade de crédito para, cunha vocación social, crear movemento no mercado e impulsar a creación de negocios. Así mesmo, dende a súa creación ata os nosos días, estas entidades destinaron parte dos seus beneficios a crear as chamadas “obras sociais” a través de fundacións ou entidades sen ánimo de lucro que contan coa colaboración, normalmente, das institucións públicas á hora de ofrecer os seus servizos á cidadanía. No caso da Deputación de Ourense isto non é diferente, mesmo despois da ruinoso venda da entidade, coa connivencia do goberno de Núñez Feijóo, a capital estranxeiro, a institución provincial segue a colaborar en proxectos da entidade cun suposto fin social. Tal é o caso do programa Activamos-Transforma Ourense, no que se pon crédito a disposición de familias, autónomos e corporacións



locais e as colaboracións nos proxectos de “Ourense, provincia intelixente” e a “ICC week”, entre outros.

Dado o mandato da Deputación de Ourense para protexer, asistir e cooperar con todo o que precisen as entidades locais da provincia, resulta imprescindible o posicionamento ante as accións dunha entidade que pretende recortar servizos nos nosos concellos, nomeadamente, nos de ámbito rural. A pesar do pouco que lle devolven e devolveron á sociedade, despois de teren que pedir perdón publicamente polas desastrosas inversións en ladrillo durante a crise ou da estafa masiva mediante a venda de preferentes, a entidade bancaria referida recibiu e recibe numerosos activos por parte dos ourensáns e ourensás que seguen a confiar nos seus servizos. Esta confianza non se ve recompensada nin recoñecida a teor da política empresarial do banco para con esta provincia, augurando que van ser máis os casos de peche de oficinas.

A pesares da aposta, decidida, dos bancos polos servizos da banca online, algo que lles resulta tremendamente barato e con apenas mantemento, a fenda dixital na que vive esta provincia, sobre todo no rural, impide que os medios dixitais se coloquen coma a primeira opción para realizar as xestións bancarias. O peche de oficinas na provincia de Ourense vai provocar, xunto con outras políticas nefastas para o asentamento poboacional, a morte de facto de numerosos pobos e localidades a medio prazo. Non existen razóns obxectivas para que se desenvolvan novos negocios ou se fomente o emprendemento en concellos que perden servizos básicos, como o da atención bancaria. Os emprendedores e empresarios non van ter incentivos á hora de desenvolver o seu negocio en concellos rurais se ó lado teñen unha vila ou concello grande que conte con todo o que precisan, dende unha boa conexión a Internet ata o banco no que realizar as súas xestións diarias. Por outra banda, se obrigamos á xente a se desprazaren para cobrar as súas pensións e facer as súas operacións, estamos impedindo que se xere movemento nos pobos, algo moi típico nos nosos concellos. Todos e todas coñecemos numerosos casos de persoas que aproveitan as súas visitas quincenais ou mensuais ó banco da localidade para efectuar compras nos negocios do lugar.

Todo isto vai desaparecer se, dende as institucións públicas, non amosamos o noso rexeitamento cara estes peches por parte dunhas entidades que tanto nos deben, dende a súa creación ata o seu rescate, pasando pola estreita colaboración de concellos e organismos supra-municipais.



Grupo Provincial Socialista

Rúa Progreso, 32 – 2º andar

32003 Ourense

Tlf. 988 317 992

Por todo o anteriormente exposto, o Grupo Provincial Socialista, somete a consideración desta Corporación a seguinte:

PROPOSTA DE ACORDOS

1. A Deputación provincial de Ourense amosa o seu rexeitamento público ás intencións de “ABanca” de peche de oficinas bancarias na nosa provincia tanto pasadas coma futuras, así coma a todas as restricións de horario na atención ó público que propoñen.
2. A Deputación provincial de Ourense estudará polo miúdo a posibilidade de considerar os seus acordos de colaboración con esta entidade así coma os contratos económicos asinados, no caso de que se materialice algún peche de oficina bancaria nalgún dos concellos ourensáns, en aras de manter a función social coa que naceu a entidade.
3. Instar á Xunta de Galicia a que lidere as negociacións coa entidade sinalada a prol de que se impida a estratexia de peche de oficinas bancarias na nosa Comunidade e, nomeadamente, na provincia de Ourense

En Ourense, a 11 de abril de 2017

Asdo. O Portavoz

SR. PRESIDENTE DA DEPUTACIÓN PROVINCIAL DE OURENSE